



Е-Mongolia цахим үйлчилгээний нэгдсэн порталаар дамжуулан хүүхдийнхээ ХПВ-ийн эсрэг вакцинд хамрагдсан талаарх лавлагаа мэдээлэл, тодорхойлолтыг авч болно.


119
ДУУДЛАГА
ҮНЭ ТӨЛБӨРГҮЙ

Хэрэв танд Хүний папиллома вирусийн эсрэг дархлаажуулалттай холбоотой нэмэлт мэдээлэл, тодруулга хэрэгтэй бол **119 тусгай дугаарт залгаж лавлана уу.**

НҮБ-ын Хүүхдийн Сангийн санхүүжилтээр хэвлэв.



ЭРҮҮЛ
МЭНДИЙН ЯАМ



World Health
Organization
Mongolia

unicef
НҮБ-ын Хүүхдийн Сан

ХҮНИЙ ПАПИЛЛОМА ВИРУСИЙН ХАЛДВАР БОЛОН СЭРГИЙЛЭХ ТАЛААРХ МЭДЭЭЛЭЛ

ЭЦЭГ, ЭХ, АСРАН ХАМГААЛАГЧДАД



МУЗГ-ын 2023 оны 472 тоот тогтоолоор баталсан үндэсний товллолын дагуу 11 насны бүх хүүхдийг Хүний папиллома вирус (ХПВ)-ийн халдварын эсрэг вакцинаар нэг удаа дархлаажуулна.

ХПВ-ийн халдварын эсрэг вакциныг сургууль дээр хийх бөгөөд ХПВ-ээр үүсгэгддэг өвчнүүд, урьдчилан сэргийлэлт, вакцины талаар нотолгоонд суурилсан товч мэдээллийг Та бүхэнд хүргэж байна.

1. ХПВ нь олон төрлийн хортой болон хоргүй хавдар үү, ургацгийг эрэгтэй, эмэгтэй хүмүүст үүсгэдэг. Одоогоор ХПВ-ийн 200 гаруй хэв шинж байна.
2. 150 гаруй улс орон ХПВ-ийн халдварын эсрэг вакциныг дархлаажуулалтын хөтөлбөртөө нэвтрүүлсэн бөгөөд вакциныг хүн бүрт хүртээмжтэй болгох, дархлаажуулалтын үйлчилгээг хүн амд ойртуулах зорилгоор сургуульд суурилсан байдлаар зохион байгуулж байна.
3. ХПВ-ийн халдварын эсрэг Гардасил (GARDASIL) вакцин нь АНУ-ын Мерк Шарп үйлдвэрийн ХПВ-ийн 6, 11, 16, 18-р хэв шинжийн халдвараас сэргийлэх рекомбинант вакцин ба 1 хүн тунгаар савлагдсан, Монгол Улсын эмийн бүртгэлд бүртгэгдсэн, ДЭМБ-ын чанарын шаардлага хангасан баталгаатай вакцин юм.
4. 2025 оны 4 дүгээр сарын 28-ны өдрийн байдлаар 33,955 гаруй хүүхдийг дархлаажуулаад байна. Эдгээр хүүхдэд ямар нэгэн урвал хүндрэл гараагүй болно.
5. Дэлхий дахинд 2006 оноос хойш ХПВ-ийн халдварын эсрэг вакцин 270 гаруй сая хүн хамрагдаад байна. Уг вакцин нь хүний биед урт хугацаанд үзүүлсэн сөрөг гаж нөлөө байхгүй бөгөөд харин ч олон төрлийн хавдрын өвчлөлийг бууруулсан талаар олон улсын судалгаанууд байдаг. Тухайлбал, АНУ, Австрали, Дани, Шотланд зэрэг вакцин нэвтрүүлсэн олон оронд УХХХ-ын 16, 18 хэв шинжийн тархалт 66-83 хувь буурч, хөвгүүдийн бэлгийн үү 48 хувиар буурсан үр дүнтэй байна.
6. Нийслэлийн Баянгол, Багануур дүүрэг, Өмнөговь, Сэлэнгэ аймгийн ХПВ-ийн халдварын эсрэг вакцины 3 тунд хамрагдсан охидыг 11 жилийн дараа дагаж судалсан Хавдрын Үндэсний Зөвлөл НҮТББ-ын судалгаагаар вакцин хамрагдсан бүлэгт ХПВ-ийн 16 болон 18-р хэв шинжийн тархалт вакцин хамрагдаагүй бүлэгтэй харьцуулахад 9 дахин буурч, түүн дотроо ХПВ 16-р хэв шинжийн тархалт 8 дахин буурсан байна. Мөн ХПВ-ийн вакцин нь ХПВ-ийн өндөр эрсдэлтэй 16-р хэв шинжээс 5 жилийн дараа 90 хувь, 11 жилийн дараа 100 хувь хамгаалсан үр дүн гарсан бөгөөд жирэмслэлт болон төрөлт ХПВ-ийн эсрэг вакцин хамрагдсан бүлэг болон вакцингүй тухайн насны бүлэгт 5, 11 жилийн дараа ижил байсан бөгөөд жирэмслэлт, төрөлтөд ямар нэгэн нөлөө үзүүлээгүй байна.
7. Вакцины найрлага дахь бодисууд хүний биед аюулгүй. Вакцин нь бусад эмийн адил нэмэлт бодисыг маш бага хэмжээгээр агуулсан байдаг. Нэмэлт

бодисууд нь ХПВ-ийн халдварын эсрэг вакцины үйлчилгээг үр дүнтэй болгох зориулалттай бөгөөд бусад вакцин, эмийн найрлагад адилхан бага тунгаар агуулагдаж байдаг. Тухайлбал:

- Хөнгөн цагааны давсыг 80 гаруй жил вакцины үйлдвэрлэлд ашиглаж ирсэн. Вакцин дахь хөнгөн цагааны давсны агууламж маш бага хэмжээтэй байдаг.
- Л-гистидин нь хоол хүнсэн дэх чухал амин хүчлийн нэг бөгөөд элэгний хавдрын эсрэг зарим вакцины найрлагад ордог.
- Полисорбат-80 нь мөхөөлдөс зэрэг зарим хүнсний найрлагад ордог. Зарим төрлийн хүүхдийн вакцин болон эмийн найрлагад агуулагддаг.
- Борын натрийн давс нь зарим төрлийн вакцин болон нүдний дусаалга зэрэг эмийн найрлагад ордог.
- Натрийн хлоридын давс нь хүний биеийн хэвийн үйл ажиллагаанд хэрэгцээтэй давс.
- Натрийн фосфатын давснүүд нь түгээмэл хэрэглэгддэг, аюулгүй юм. Эдгээр нь хүчил шүлтийн тэнцвэртэй байдлыг хангах, вакцины идэвхтэй нэгдлүүдийг тунахаас сэргийлдэг.

Вакцины аюулгүй байдлын дэлхийн зөвлөлдөх хороо бүх нотолгоо, судалгааг тогтмол хянасны үндсэн дээр хөнгөн цагаан агуулсан вакцин эрүүл мэндэд үзүүлэх эрсдэл байхгүй гэж дүгнэсэн.

Вакцин дахь хөнгөн цагааны агууламж маш өчүүхэн байдаг. Хүн өдөр тутмын хоол хүнсээр дамжуулан вакцинтай харьцуулахад 35 дахин их хэмжээний хөнгөн цагааныг авдаг. Хөнгөн цагаан нь жимс, хүнсний ногоо, шар айраг, дарс, амтлагч, гурил, үр тариа, самар, сүүн бүтээгдэхүүн, хүүхдийн сүүн тэжээл, зөгийн бал зэрэг олон төрлийн хоол хүнс, ундаанд агуулагддаг бөгөөд насанд хүрэгчид өдөрт 7-9 миллиграмм хөнгөн цагаан хэрэглэдэг. Харин ХПВ-ийн халдварын эсрэг вакцин хөнгөн цагааны давс 225 микрограмм агуулагддаг.

8. ХПВ-ийн халдварын эсрэг вакцин нь бусад вакцины адил халуурах, бөөлжих, дотор муухайрах, толгой эргэх, толгой өвдөх болон тарилга хийлгэсэн газар хөндүүрлэх, хавдах, улайх, загатнах, хөхрөх шинжүүд илэрч болно. Энэ нь 2-3 өдрийн дараа аяндаа арилна.
9. Монгол Улсын Дархлаажуулалтын тухай хуулинд зааснаар “заавал хийх дархлаажуулалт” гэж дархлаажуулах насны бүх хүнийг заавал хамарвал зохих дархлаажуулалтыг хэлэх бөгөөд иргэн эрүүл мэндийн байгууллагын зөвлөмжийн дагуу сэргийлэх тарилга хийлгэх; тарилгад хамрагдах хугацааг эрүүл мэндийн байгууллагаас албан ёсоор мэдэгдсэн тохиолдолд сэргийлэх тарилгаас хоцрохгүй байх үүрэгтэй.

Эрхэм хүндэт эцэг эх, асран хамгаалагч Танд ХПВ-ийн халдвар болон сэргийлэх талаарх мэдээлэлтэй танилцсанд баярлалаа.